

**Naalakkersuisunik toqqaaneq**

(Naalakkersuisut Siulittaasuut)

**Saqqummiussissut**

(Naalakkersuisut Siulittaasuut)

Siullermik, sivikitsumik piffissaqartitsiviusumik ilimasaaralunga Naalakkersuisut katitigaanerisa allannguuteqartinnissaannut inassuteqaatima saqqummiussinnaanissaanut, maani Inatsisartuni ullumi ullormut oqaluuserisassani inissaqartinneqarsinnaagama, Inatsisartut Siulittaasoqarfiat qutsavigissavara.

Aningaasaqarnermut Aatsitassanullu Naalakkersuisoq Andreas Uldum, Demokraatit, napparsimanini pissutigalugu Naalakkersuisuni ilaasortatut sulinerminut qaammatini pingasuni sulinngiffeqarsinnaanissamik qinnuteqartariaqarsimavoq.

Taamaattumik Inatsisartut aamma Naalakkersuisut pillugit Inatsisartut inatsisaanni nr. 26, 18. november 2010-imeersumi § 24 naapertorlugu peqqiilliornermik pissuteqartumik ippassaq ulloq aallarnerfigalugu Andreas Uldum Naalakkersuisuni ilaasortatut sulinngiffeqarnissaanik akueralugu aalajangerpunga.

Ulluinnarni suliaqarnermi aammalu Naalakkersuisut katitigaaneranni politikikkut oqimaqaatigiissinissaq attatiinnarniarlugu, Inatsisartunut ilaasortap Randi Vestergaard Evaldsen-ip, Demokraatineersup Naalakkersuisuni ilaasortatut nutaatut akuerineqarnissaa inassutigissallugu aalajangerpunga. Tamatuma peqatigisaanik annikinnerusumik akisussaaffeqarfinnik paarlaassuinermik kinguneqassaaq, tassami akisussaaffeqarfiit Inuussutissarsiorneq, Suliffeqarneq aamma Niuerneq Randi Vestergaard Evaldsen-imut tunniunneqassapput. Akisussaaffeqarfiit Aningaasaqarneq, Aatsitassat aamma Nunanut Allanut susassaqarfiit Naalakkersuisunut ilaasortamut Vittus Qujaukitsumut, Siumumeersumut tunniunneqassapput.

Inatsimmi matuma siuliani taaneqartumi § 22 imm. 3 naapertorlugu inassutigissavara Naalakkersuisut katitigaanerat manna Inatsisartuni taasissutigineqassasoq:

1. Knud Kristiansen, Atassut, Ineqarnermut, Sanaartornermut Attaveqarnermullu Naalakkersuisuuginnassaaq.
2. Vittus Qujaukitsoq, Siumut, Aningaasaqarnermut, Aatsitassanut Nunanullu Allanut Naalakkersuisunngussaaq.
3. Karl-Kristian Kruse, Siumut, Aalisarnermut, Piniarnermut Nunalerinermullu Naalakkersuisuuginnassaaq.
4. Martha Lund Olsen, Siumut, Ilaqutariinnermut, Naligiissitaanermut Isumaginninnermullu Naalakkersuisuuginnassaaq.
5. Doris Jakobsen, Siumut, Peqqissutsimut Nunanillu Avannarlernik Suleqateqarnermut Naalakkersuisuuginnassaaq.
6. Nivi Olsen, Demokraatit, Ilinniartitaanermut, Kultureqarnermut, Ilisimatusarnermut Ilageeqarnermullu Naalakkersuisuuginnassaaq.
7. Mala Høy Kúko, Atassut, Pinngortitamut, Avatangiisinut Inatsisinillu Atuutsitsinermut Naalakkersuisuuginnassaaq.
8. Randi Vestergaard Evaldsen, Demokraatit, Inuussutissarsiornermut, Suliffeqarnermut Niuernerullu Naalakkersuisunngussaaq.
9. Andreas Uldum, Demokraatit, Naalakkersuisunut ilaasortaq (sulinngiffeqarpoq)